

Starfsáætlun 2018 – 2019

Leikskólinn Skerjagarður

Umsögn foreldraráðs

Foreldraráð leikskólans skipa:

Súsanna Pétursdóttir, formaður
Telma Magnúsdóttir, gjaldkeri
Guðrún Dóra Steindórsdóttir, ritari
Ólöf Viktorsdóttir
Steinunn Bergs
Sóldís Harðardóttir, tengiliður leikskólans

Um starfsáætlanir leikskóla

Samkvæmt lögum um leikskóla nr. 90/2008 vinna leikskólar eftir aðalnámskrá fyrir leikskóla. Samkvæmt henni vinnur hver og einn leikskóli upp sína skólanámskrá þar sem fram kemur á hvern hátt leikskólinn uppfyllir þau viðmið sem þar eru sett fram.

Leikskólar gera starfsáætlun þar sem fjallað er um árlega starfsemi leikskólans, birt skóladagatal og ýmsar aðrar hagnýtar upplýsingar um skólahald hvers leikskóla. Áætlunin þarf að fá umsögn foreldraráðs áður en skóla- og frístundaráð tekur hana til afgreiðslu samkvæmt lögum um leikskóla.

Tilgangur starfsáætlunar er að gera skólaþróun leikskólans markvissa með árangursmiðuðum markmiðum og umbótamiðuðu innra mati. Hún á að sýna starfsfólki, foreldrum og rekstraraðilum hvernig starf leikskólans gekk á síðasta leikskólaári og hvernig unnið verði að umbótum og nýjum verkefnum á því næsta.

Í starfsáætlun leikskólans skulu koma fram:

- Matsaðferðir leikskólans og umbótamiðuð áætlun sem unnin er út frá niðurstöðum innra og ytra mats.
- Áherslur í leikskólastarfinu sem ætlunin er að vinna að, markmið, leiðir að markmiðunum áætlun um hvernig þau verða metin.
- Áherslur í starfsáætlun skóla- og frístundasviðs sem leikskólinn vinnur að.
- Starfþróunaráætlun leikskólans og upplýsingar um starfsmannamál.
- Heildarfjöldi barna, og fjöldi barna sem njóta sérkennslu og barna af erlendum uppruna.
- Foreldraráð, foreldrafélag, foreldrafundir og foreldraviðtöl.
- Umsögn foreldraráðs.
- Skóladagatal fyrir árið.

Starfsáætlun leikskólans tekur gildi 1. september ár hvert og skal skilað rafrænt til skóla- og frístundasviðs fyrir 1. júlí. Starfsáætlanir eru lagðar fyrir skóla og frístundaráðs til samþykktar.

Mat á leikskólastarfi

Tilgangur innra mats er að leggja faglegan grundvöll að endurbótum í leikskólastarfi og vinna kerfisbundið að því að auka gæði þess og gera það skilvirkara.

Markmið innra mats samkvæmt lögum um leikskóla er að:

- Veita upplýsingar um skólastarf, árangur þess og þróun til fræðsluyfirvalda, starfsfólks leikskóla, viðtökuskóla og foreldra.
- Tryggja að starfsemi leikskóla sé í samræmi við ákvæði laga, reglugerða og aðalnámskrár leikskóla.
- Auka gæði náms og leikskólastarfs og stuðla að umbótum.
- Tryggja að réttindi barna séu virt og að þau fái þá þjónustu sem þau eiga rétt á samkvæmt lögum.

Skólanámskrá leikskólans er skrifleg lýsing á því sem gert er í leikskólanum og á því sem á að gera. Þar koma fram bæði markmið og leiðir leikskólans. Skólanámskrá leikskólans setur því viðmið fyrir matið. Tilgangur ytra mats er að safna upplýsingum um viðhorf foreldra leikskólabarna og starfsmanna til að nota við innra mat leikskólans. Að auki er það liður í ytra mati skóla- og frístundasviðs og/eða Mennta- og menningarmálaráðuneytis.

Hlutverk foreldraráðs

Samkvæmt 11.gr. laga um leikskóla frá 2008 er hlutverk foreldraráðs að gefa umsagnir til leikskóla og nefndar, sbr. 2. mgr. 4. gr., um skólanámskrá og aðrar áætlanir sem varða starfsemi leikskólans. Þá skal ráðið fylgjast með framkvæmd skólanámskrár og annarra áætlana innan leikskólans og kynningu þeirra fyrir foreldrum. Foreldraráð hefur umsagnarrétt um allar meiri háttar breytingar á leikskólastarfi.

Umsögn foreldraráðs:

Foreldraráð leikskólans Skerjagarðs hefur fengið starfsáætlun Skerjagarðs fyrir árið 2018-2019 og lýsir ráðið yfir almennri ánægju með starfsáætlun leikskólans Skerjagarðs, sem og starfið sem unnið hefur verið síðasta árið. Að mati ráðsins er á leikskólanum Skerjagarði unnið metnaðarfullt og einstaklega faglegt og gott starf sem tekur mið af áhugasviði barnanna auk eflingu mikilvægra þátta í félagsfærni þeirra.

Umbótaáætlunin gefur til kynna að stjórnendur leikskólans haldi áfram á sömu framfara braut og síðastliðin ár en færi um leið starfið enn frekar í fastar skorður og dreifi ábyrgð á starfinu til allra starfsmanna, með því að virkja alla starfsmenn til að taka þátt í hugmynda- og umbótastarfinu. Þá er aukin áhersla á að fræða börnin sjálf um gildi leikskólans og börnunum áfram gefið færi á að taka þátt í stefnumótun eigin starfs. Afar jákvætt er að börnunum sé á þennan hátt gefinn kostur á að taka þátt í beinu lýðræði, að þau fái færi á að finna að skoðanir þeirra skipti máli og að á þau sé hlustað þegar ákvarðanir sem varða þau sjálf eru teknar.

Hin aukna áhersla á útikennslu hefur mælst vel fyrir, og sérstaklega ánægjulegt hvernig nánasta umhverfi leikskólans hefur verið nýtt til bæði leiks og kennslu þegar færi hefur gefist. Þannig hefur starfssvæði leikskólans verið aukið og þar með vegið upp á móti annars þröngu húsnæði leikskólans. Þetta er m.a. gert með tíðum vettvangsferðum; t.d. heimsóknum á bókasöfn, fjöruferðum og öðrum skoðunarferðum um borgina þar sem forvitni og áhugi barnanna sjálfra hefur fengið að blómstra með aðstoð áhugasamra kennara.

Samskipti foreldra og starfsmanna eru mjög góð, almennt má finna fyrir að starfsfólki er mjög umhugað um velferð barnanna og að vel sé hugsað um börnin á Skerjagarði.

Foreldrar fá í upphafi hvers mánaðar upplýsingar um bæði matseðil mánaðarins og dagskrá deildarinnar. Þáttaka foreldra í starfi leikskólans er boðin velkomin og almennt er vel í það tekið ef foreldrar koma með athugasemdir eða tillögur að úrbótum í starfi.

Þá er gott að sjá að starfsandinn á leikskólanum virðist vera einstaklega góður, enda er ánægja starfsmanna mikilvæg til að skapa nauðsynlega festu í starfi skólans, sem svo skilar sér í aukinni ánægju barnanna.

Hin mikla gleði sem sést hjá bæði börnunum og starfsfólki leikskólans er afskaplega einkennandi fyrir starfsemi Skerjagarðs, en einnig ber að nefna hina miklu virðingu fyrir börnunum sjálfum og áhuga þeirra sem einkenna hið frábæra starf sem unnið er á leikskólanum Skerjagarði.

Súsanna Pétursdóttir, formaður